

## Jannata Waadaa Galamte Kafaruu fi Shirkii Dalaguun hin dhabinaa-kutaa 2.3

### Description

#### Qananii Jannataa-kutaa 3

##### Faayaa fi Uffata Warra Jannataa

Bareedinna faayaa fi uffata warra Jannataa hin gaafatin. Akkuma isaan addunyaa keessatti iimaanaa fi hojii gaggaariin of faayan Jannataa keessattis faayaa fi uffata garmalee bareedan faayamu. Jechama, “Al-Jazaa’u min jiinsil amal (Jazaan gosa hojiitini)” jedhamu hin dhageenyee? Namni addunyaa keessatti qalbii isaa qulqulleesse, keessaa fi ala isaa iimaanaa fi hojii gaggaariin faaye, Aakhiraatti keessi isaa ni qulqulleefama, gubbaan isaa ni faayama. Rabbiin subhaanahu wa ta’ala ni jedha:

٦٠ ﴿٦٠﴾ هَلْ جَرَاءُ الْأَلْحَسِنِ إِلَّا أَلْأَحْسَنُ

“Sila mindaan toltaa tolta malee ni jiraa?” Suuratu Ar-Rahmaan 55:60

Keessi warra Jannataa qulqulleefamu ilaachise, Rabbiin olta’aan ni jedha:

وَنَزَعْنَا مَا فِي صُدُورِهِمْ مِنْ غِلٍ إِخْوَانًا عَلَى سُرُرٍ مُتَقَبِّلِينَ ﴿٤٧﴾  
لَا يَمْسُهُمْ فِيهَا نَصْبٌ وَمَا هُمْ مِنْهَا بِمُخْرَجٍ ﴿٤٨﴾

“Jibba irraa wanta qoma isaanii keessa jiru ni baafna, [kanaafu isaan] obboleeyyan sireewan irratti walitti garagalat ta’u. Achi keessatti dadhabbiin isaan hin tuqu. Isaan achi keessaas kan baafamanii miti.” Suuratu Al-Hijr 15:47-48

[Kana jechuun qalbii isaanii keessa jibba, waanyu (hinaaffi) fi diinummaa hunda ni baafna. Jannata keessa obboleeyyan wal jaallatan ta’anii jiraatu. Sireewan (algaa) gurguddaa irra fuula walitti garagalchanii taa’u. Jannata keessatti dadhabbiin isaan hin tuqu. Isaan abadii achi keessa jiraatu.]

Mee amma gubbarraan maal akka uwatifamanii fi faayaman haa ilaallu:

﴿إِنَّ الَّذِينَ ءَامَنُوا وَعَمِلُوا الصَّلِحَاتِ إِنَّا لَا نُضِيعُ أَجْرَ مَنْ أَحْسَنَ  
عَمَلاً﴾ أُولَئِكَ لَهُمْ جَنَاحُ عَدْنٍ تَجْرِي مِنْ تَحْتِهِمُ الْأَنْهَرُ يُحَلَّوْنَ فِيهَا  
مِنْ أَسَاوِرَ مِنْ ذَهَبٍ وَيَلْبَسُونَ ثِيَابًا خُضْرًا مِنْ سُندُسٍ وَإِسْتَبْرَقٍ  
مُتَّكِئِينَ فِيهَا عَلَى الْأَرَائِكِ نِعْمَ الشَّوَابُ وَحَسُنَتْ مُرْتَفَقًا﴾

“Dhugumatti, warri amananii fi hojii gaggaarii hojjatan, dhugumatti Nuti mindaa nama hojii bareechisee hin balleessinu. Warra san Jannata Qubsumaatu isaaniif jira; laggeen isaan jala yaa’u. Achi keessatti isaan gumeewwan warqee irraa ta’een miidhagfamu. Uffata magariisaa hariira haphii fi furdaa irraa [hojjataman] uffatu. Ishii (Jannata) keessatti sreeewwan faayaman irratti hirkatanii taa’u. Mindaan waa tole! Iddoon boqonnaas waa bareede!” (Suuratu al-Kahf 18:30-31)

Rabbiin subhaanahu wa ta’alaa mindaa nama hojii bareechisee akka hin balleessinee dubbata. Garuu kana yommuu jedhu nama hojii bareechisee hunda mindaa isaa hin balleessu jechuudhaa? Lakki, dubbiin akkanaa miti. Yaada kana oofuf, jalqaba irratti namni hojii bareechisu amala akkami qabaatu akka qabu ni dubbate. “**Dhugumatti, warri amananii fi hojii gaggaarii hojjatan...**” Namni hojii jalaa hin balleessine nama hundeeewan iimaanatti amane ta’uu qaba. Namni hundeeewan kanatti hin amanne, kufrii isaa hojii isaa gaarii hunda jalaa balleessa.

Namni erga Rabbii olta’atti, Malaaykotatti, Kitaabban Isaatti, Ergamtoota Isaatti, Guyyaa Aakhiraatti fi qadaratti amane booda hojii isaa bareechisee, Rabbiin olta’aan mindaa isaa jalaa hin balleessu. Garuu hojii bareechisu jechuun maal jechuudhaa? **Hojii bareechisuu** jechuun **Rabbiif jedhanii hojii gaarii hojjachuu** fi yommuu hojjatan shari’aa **Rabbii hordofuudha**. Fakkeenyaf, namni salaataa Rabbii olta’af jedhe salaate fi akkaataa Nabiyyiin (SAW) itti salaatanitti sharxii fi arkaana eegun yoo salaate, inni hojii bareechise. Namni haala kanaan hojii gaarii hojjate, Rabbiin mindaa isaa akka baduu hin taasisu. Kanaafi itti aanse mindaa namoota akkanaa ni dubbate:

“**Warra san Jannata qubsumaatu isaaniif jira.**” Kana jechuun namoota amananii fi hojii gaggaarii hojjataniif Jannata yeroo hunda keessa turanii fi jiraatantu jira. Golootaa fi manneen isaanii jala laggeentu yaa’aa. Achi keessatti namoonni kunniin gumeewwan warqiit faayamu. Gumeewwan faaya harka irratti godhataniidha. Uffata magariisa hariira haphii fi furdaa irraa hojjatame uffatu. Sreeewwan agoobaraan haguuggamanii fi miidhagfaman irratti hirkatanii taa’u.[\[1\]](#)

Aayaan (keeyyattonni) armaan olii hojii gaggaarii hojjachuu fi bareechisuuf kakkaa'umsa guddaanamaaf ta'u. Sababni isaas, namni hojii gaggaarii hojjatu hundaaf mindaa akka argatu yoo beeke, hojiigaarii hojjachuu irratti ni jabaata. Mindaan isaaf kennamu gaarii akka ta'e yoo beeke immoo hojiihojjatu caalatti bareechisuuf carraaqa. Dhugumatti, Jannani mindaa hunda caalaa gaarii taatedha. Rabbiin subhaanahu wa ta'aalaa ni jedha:

وَعَدَ اللَّهُ الْمُؤْمِنِينَ وَالْمُؤْمِنَاتِ جَنَّتٍ تَجْرِي مِنْ تَحْنِهَا  
الْأَنْهَرُ خَلِدِينَ فِيهَا وَمَسَكِنَ طَيْبَةً فِي جَنَّتٍ عَدْنٍ  
﴿٧٦﴾ وَرِضْوَانٌ مِّنْ كُلِّ أَكْبَرٍ ذَلِكَ هُوَ الْفَوْزُ الْعَظِيمُ

“Rabbiin mu'mintoota dhiiraatii fi dubartootaf Jannata laggeen jala yaa'an, achi keessatti kan hafan ta'anii fi manneen gaggaarii Jannataa qubsumaa keessa jiran waadaa galeefi jira. Jaalalli Rabbiin irraa ta'e kana hundarra caala. Suni milkaa'inna guddaadha.” (Suuratu At-Tawbaa 9:72)

### Jannata keessatti qananiin hundarra guddaan maal akka ta'e beektuu?

Mee itti yaadaa! Nyaataa dhugaatin, manneen, firaashni, minxaafin, uffanni, faayni fi qananiin lakkaawame hin dhumne Jannata keessa ciisa. Kunniin wantoota Rabbiin subhaanahu wa ta'aalaa uumeda. Mee itti yaadaa! Uumama addaa takkuu hin argine, garmalee kan bareedu fi nama dinqiisisuu yeroo jalqabaatiif yommuu argitan hangam gammadduu? Dhugumatti garmalee gammaddu. Jannani uumama takkuu hin argine garmalee tan nama dinqiisiistudha. Garuu Khaaliqa Jannata tana, samii fi dachii uume osoo ijaan argitanii hangam isin gammachiisaa? Khaaliqa tokkicha fakkaataa hin qabne, amalooni Isaa gara hundaan guutuu hanqinna hin qabne osoo ilaaltanii gammachuu akkamiitu isinitti dhagahamaa? Rabbii olta'aa si uumee fi si kunuunsu ilaaluun hangam si gammachiisaa?

Dhugumatti, qanani fi gammachuun hunda caalaan Jannata keessatti argatan Rabbii olta'aa ilaaludha. Warri Jannataa yommuu Rabbii olta'aa argan, qanani biroo ni dagatu. Rabbiin subhaanahu wa ta'aalaa ni jedha:

﴿٢٣﴾ وَجْهٌ يَوْمَئِذٍ نَّاضِرٌ إِلَى رَبِّهَا نَاطِرٌ

“Fuulli [gariin] Guyyaa san ni ifu. Gara Goftaa isaanii ilaalu.” Suuratu Al-Qiyaamah 75:22-23

Ergamaan Rabbii (SAW) akkana jedhan: “Yommuu warri Jannataa Jannata seenan, Rabbiin tabaarakwa ta'aalaa ni jedha: Isiniif dabalaawaa waa ni barbaaddu?” Isaanis ni jedhu, “Fuula keenya hin ibsinee? Ibidda irraa nu baraarun Jannata nu hin seensifnee?”, Ergasii Rabbiin haguuggi Isaa ni saaqa (ni kaasa). Gara Goftaa isaanii ilaalu caalaa wanti isaan biratti jaallatamaa ta'e hin jiru.” Itti aanse aaya tana ni

---

qara'e:

لِلَّذِينَ أَحْسَنُوا الْحُسْنَى وَزِيَادَةٌ وَلَا يَرْهَقُ وُجُوهُهُمْ قَرْتُرٌ وَلَا ذَلَّةٌ  
أُولَئِكَ أَصْحَابُ الْجَنَّةِ هُمْ فِيهَا خَلِدُونَ



“Isaan toltaa hojjataniif [mindaan] gaarii fi dabalaataatu jira. Gurraachinnii fi salphinni homaatu fuula isaanii hin haguugu. Isaan sun warra Jannataati. Isaan ishee keessatti hafoodha.” (Suuratu Yuunus 10:26) [Sahih Muslim 181](#), [Jaami'u At-Tirmizii 3388](#)

Imaamu ibn Al-Qayyim ni jedha: Addunyaan Rabbiin beekuu fi Isa jaallachuun malee gaarii hin taatu, Jannanis Isa ilaalun malee gaarii hin taatu. ” Madaariju Saalikiin 976 (Ar-Risaalah Publisher) Dhugumatti, akkuma addunyaa keessatti qananii fi gammachuun hunda caalu Rabbiin beeku fi Isa jaallachu ta'e, Jannata keessattis qananii fi gammachuun hunda caalu Isa ilaaludha.

---

[1] Tafsiir Muyassar-297, Tafsiir Sa'dii- 553

**Date Created**

July 8, 2020

**Author**

admin